

RUSIGNOLU

+++++

SA campagna torreit in fiore,  
e-i sos puzones, a chelu torrados,  
bi 'ettaian cantos de amore.

Birdes torrein tancas e cunzados,  
e-i sos campos, pienes de isplendore,  
che a festa solenne fin parados.

Pinzas sas pedras cambiein colore.  
In su chelu serenu e indeoradu,  
torreit che a prima ogni rumore.

E tue, intr'e una gabbia inserradu,  
miraias, pienu 'e tristura,  
sos logos 'ue prima haias boladu.

Attesu, 'idias lughendhe sa pianura,  
e aiscultaias sas campanas  
de arveghe ispartas in pastura.

Cun s'uju triste, miraias luntanas,  
in-d-unu mare 'e lughe, che de oro,  
lughida' sas calandras solianas.

Tandho s'ammentu t'istringhiat su coro,  
e a s'intirinada, candho solu  
sas ranas cantaian tottu in coro,  
daias isfogu a s'inserradu dolu,  
e isparghias in chelu melodias  
bellas che-i su piantu, rusignolu.

A sos chelos chi perdidos haias  
tranquilla unu sero fit montendhe  
sa luna 'e arghentu ch'amaias.

Su 'entu, a murrunzu, appeighittendhe  
fit sa campagna. Chigulas e grillos  
sutta su chelu fini serenendhe.

Candho canteis: prima duos trillos  
acutos, poi caglieis, poi fruscieis  
limpidos versos, puros che zampillos.

Cantos perdidos benes ammenteis,  
rusignolu amadu; cantos bolos,  
cantas dies de amore lagrimeis!

Candho, chirchendhe s'umbra 'e sos cuzolos,  
faghias amorosas serenadas  
a sa cumpagna tua; candho dolos  
e penas ti fin cosas ignoradas.

Cale piantu fatteis in s'ammentu  
de dies chi pro sempre fin passadas!

A passitos, piedosu, andheit su 'entu.

Ogni 'oghe caglieit: soberanu,  
isconsoladu, solu su lamentu  
soneit tou de morte. Adlu 'eranu,  
adlu vida mala 'e iscunfortu,  
adlu sole chi lughes invanu!

A manzanile t'accioppei, mortu,  
cun su cantu pius bellu sepoltu.

SALVATORE FARINA  
VICOLO S. PELLICO 2 OZIERI

*Salvatore Farina*